

Saturday, January 3, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

CHOLERA

Lawngtlai leh Siaha district a tuihri leng mek chuan zia-awm lam a pan zel a, Myanmar ramri khar mek pawh hlih thuai tum a ni.

Lawngtlai district bawrhsap Pu Donny Lalruatsanga chuan an district a tuihri leng chu a zia-awm tawh hle tih Akashvani Aizawl news a hrilh a. Ven thawh thil thu-ah erawh chuan he hri rawn putluhna ber ni a hriat Myanmar ramri chu khar chhunzawm a la ni a. Chutih lai-in thla 2 khar tur tih chu pawt tawi-in tun thla ni 10- a hlih tura ruahman a nih thu a sawi. Puan tawh angin Lawngtlai district-a Kakichhuah khua-ah nikum November thla khan tuihri avangin mi 6 an thi a, December thla chawhnu lamah 4 an thi a, Lawngtlai district-ah mi 10 an thi a ni. December thla chawhnu lam hian tuihri natna vei mi 8 chu Lairam Christian Medical Centre & Hospital-ah enkawl an ni bawh. Hetiang a nih avang hian Lawngtlai bawrhsap chuan December ni 23 khan thla hnih chhung atan Myanmar ramri kharna thupek a chhuah a ni.

Siaha district Additional DC Pu Abraham Beirazi Khithie chuan ramri khar thupek a chhuah, naktuka tawp tur chu pawhsei a nih dawn leh dawn loh a la sawi theih loh thu Akashvani Aizawl news a hrilh a. Tuihri leng dinhmun chu a zia-awm tawh hle a an hriat thu a sawi a. Ramri khar chuan zawm that a hlawh tih a sawi bawh. Siaha district-ah hian November thla khan tuihri avangin mi 3 an thi a. December thla chawhnu lamah khan Lomasu, Lodaw, Lopu leh Khaikhy khua-ah te a leng leh a, nunna chan erawh chu an awm lo. Tipa community health centre (CHC) a tuihri natna vei dahluh mi 6 bak chu kai thar an awm tawh lo ni a a hriat thu a sawi a. Addl. DC chuan tuihri natna kaite hi Myanmar lama bungraw phurlut thin lirthei khalhtute leh sumdawng vek an nih thu a sawi a ni.

Ramri khar lai hian Myanmar lam atanga sumdawnga lo lut an awm hranpa loh avangin Mizoram atanga bungraw hralh tura kal dan vek an ni a. A ruka kawng danga kal an awm a nih loh chuan insumdawnga atana kawng hman pui berte chu khar tlat a ni rih. Chin state chhim lam Paletwa leh a chheh vel khua-ah tuihri hi a len avangin insumdawn tawnga a Mizoram lam atanga inhnawmawihthe'n an kai tih hria-in ramri hi khar a ni.



LADC

Nikum December ni 3 a Lai Autonomous District Council (LADC) inthlan a vote tlate, December ni 9 a chhiar zawh a nih hnu-ah, LADC ah Sorkar a la piang lo.

Puan tawh thin angin bial 25 awmna LADC ah MNF chuan bial 8 la-in, Congress in bial 7, ZPM in bial 6, BJP leh Independent in bial hnih ve ve an la a.

Party mala Sorkarna siam thei an awm loh vangin ZPM leh MNF chuan ZPM kaihhruaina hnuaiah Sorkar intawm an siam theih thu Krismas hma khan District Council & Minority Affairs department kaltlangin larsap hnenah an thlen tawh a, larsap pawmpuina nghah mek a ni. Larsapin protem chairman atan a ruat Pu Lallura Chinzah chu December 22 khan Lawngtlai Bawrhsap Pu Donny Lalruatsanga'n rinawmna thu tiamtirin a laluta, protem chairman hian MDC tharte a lalut zui nghal.

Larsapin ruahmanna a siam angin kar leh Thawhtanni khian LADC Chairman thlan a ni dawn a, Sorkarna siam tuma thawk dun mek, ZPM leh MNF te'n ruahmanna an siamdan chuan Chairman atan MNF Member ni tura tih a ni.



HOSPITAL REPORT

Aizawl khawpui chhung leh ZMC&H, Falkawn a damdawi-in hrang hrangah nimin atanga tukin zing dar 7 inkar khan hriat theih chinah mitthi 5 an awm a, nau piang 12 an awm ni a hriat a ni. He'ng damdawi-inah vek hian tunkar chhung khan mitthi 41 an awm a, nau piang 128 an awm ni a hriat a ni bawk.

Nimin tlai leh nizan khan Civil Hospital Aizawl Casualty hruai mi 98 an awm a. Causalty a hruai tam ber chu pum na leh luak a ni. Lirthei chetsual avanga hliam 8 zingah ruh tliak 1 a awm.Hemi hun chhung hian Civil Hospital-ah nau piang hmeichhia 1 a awm a mitthi 2 an awm bawk. Synod Hospital Durtlang Casualty ah hemi hun chhung vek hian mi 24 hruai an ni a, ZMC&H casualty-ah mi 37 hruai an ni bawk. Casualty-a hruai zingah hian a tam ber chu zu vanga thi a luak, khawsik leh thawhah a ni.



METH SEIZURE

Nimin khan Assam Rifles leh Mizoram Police tangrual chuan Keifang khaw huam chhungah methamphetamine kg 11 leh gram 62 an man.

Myanmar atanga Methamphetamine tawlhurutu ni a rinhlelh, Hasan Ali, Badarpur, Assam a cheng ni a inchhal chu a ruihhlo phurhna lirthei nen Saitual Police Station-ah hlan a ni a. Ruihhlo tawlh a nih dan hi chhui zui mek niin Saitual Police Station-ah hian Narcotic Drugs & Psychotropic Substances Act, 1985 hmangin thubuai ziahluh a ni a. Hasan Ali hi Saitual district court a hruai a ni tawh bawk.

